



# Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.


e-mail : tiryimyim@gmail.com

TAPAK 6

Yangia anidakangma :



Tir Yimyim



tiryimyim@aolima



tir yimyim

TAPAK 8

Meghalaya nung NEP benoktsü atema sen crore 500 shi nungdaktsü: CM Sangma

Iga Swiatek Guadalajara WTA event nung shilem magitsü



VOL. XX NO. 334 (ADOK 334) DIMAPUR ROGONÜ (FRIDAY)

RONGJUI (SEPTEMBER) 15, 2023

₹ 5.00

## Taruba financial year nung Foothill Road atema sen lezmüksütsü: CM

**Kohima, Rongjui/Sept. 14 (TYO):** Assam-Nagaland arütsü anasa Mon nung aliba Tizit nungi Peren nung aliba Khelma tashi Foothill Road yanglutsü atema state sorkari temolung agütsü aser taruba financial year nungi sen bushia mapa tenzüksü, ta Nagaland Chief Minister Neiphiu Rio-i tanü ashi.

13th NLA amendang September 22, 2022 nung Assembly pangzüng renema nenshia asr MLA Achumbemo Kikon-i metetnü asüngdang langzüdang Rio-i iba ya ashi. House ajanga Foothill Road yanglutsü ya North Eastern Council (NEC) kübok yutsütsü pangjema liasü aser Kikon-i ibaji inyak asü masü ta asüngdang.

"Onoki iba ken o Ministry of Road Transport and Highways (MoRTH) den jembia arur aser Union Minister Nitin Gadkari-a ajuruogo saka pai National Highways ya pa den masü saka Ato Kilonser den lir aser sen lezmüksütsü pa dak tashi mali ta ashi," ta Rio-i ashi.

Ajisüaka Union Minister-i Bharat Mala kübok sen agütsütsü nangzük saka taoba kümsük nung pai meinyaktet, anungji tang kümsük nunga state sorkari Union Minister ajurua iba indang lephsia liasü aser pai Gati Shakti nungi sen agütsütsü ashi saka tang tashi kecha magütsü lir, ta Chief Minister-i ashi.

(Maneni tapak 2 nung...)

## Nüburtem mechi IMDH menua melie renemtsüla: AKM

**Dimapur, Rongjui/Sept. 14 (TYO):** Imkongliba Memorial District Hospital (IMDH), Mokochung yanglutsü mapang atsülangba asoshi Ao Kaketshir Mungdang (AKM) ajanga KC Infra Projects Private Ltd dangi tezüluba ka agütsüogo.

AKM ajanga züluba shidi nung, IMDH yanglutsü asoshi Detailed Project Report (DPR) specifications nung shia aliba ama masü mapang talangka anendaka arur, ta shia lir.

Iba maparen inakyim nung atsülangba ajanga yangi aliba aser anasa aliba district tem nung alirtem healthcare tajung agitsü asoshi timtem ajurur. Iba yongji timtem balala ajuruba dang masü saka nungdakbapur takum lendong nung yutsü, ta AKM tir Lanutoshi Aier aser tongti zülur Satemmongba nati züluba shidi

nung shia lir.

Nüburtem tesunep nung alitsü asoshi healthcare ki o jen mapang shidak nung renemtsü ya kangasa tongtipang lir. Anungji nübu tali agüja IMDH yangluba maparen tekeraba nung tembangtsü ajungshir, ta AKM ajanga ashi.

Sorkar aser contractor tem dang iba maparen atsülangba tebilemstü tasü ita bentetsü aser mapang tali meindoki iba project tekeraba nung renemtsü asoshi temolung agütsütsü ajungshir, ta ashi.

Maneni DPR nung shia aliba ama mapa tajungtiba nung shidak inyaka renemtsü asoshi nenok dang nungi teyari aginer. Nenoki tali atsülanga melie tekeratiba nung telangzüba tajung agütsütsü imla atar, ta AKM ajangasa ashi.

## 14 buba NLA indang Session tanabuba tembangogo

**Kohima, Rongjui/Sept. 14 (TYO):** Nagaland Assembly Speaker, Sharingain Longkumer-i tanü 14 buba Nagaland Legislative Assembly indang session tanabuba tembangia liasü.

Iba session ya September 11 nungi 14 tashi agia liasü.

Pai iba senden tembanga jembidang, political party balala nungi süaka züngsemtemi state asoshi tongtipang ken o jembiba mapang tejangraba nung shilem agiogo, ta ashi.

Anogo asem tashi senden amendang Question Hour nung 'starred questions' 23 aser 'unstarred questions' 8 liasü, Matters of Urgent Public Importance densema state asoshi tongtipang ken o aika House nung jembia liasü.

House nung Bill pongu tashi agizükogo aser itemji The Nagaland Motor Vehicles Taxation (Amendment) Bill, 2023; The Nagaland Passengers & Goods Taxation (Amendment) Bill; The North East Christian University (Second Amendment) Bill, 2023; Nagaland Anatomy Bill 2023 aser The Nagaland Goods and Services Tax (Seventh

Amendment) Bill, 2023 alitsü.

Iba senden nung The Employment of Manual Scavengers and Construction of Dry Latrines (Prohibition), Act, 1993 melen Act tasen - The Prohibition of Employment as Manual Scavengers and their Rehabilitation Act 2013 yanglu; The Protection of Children from Sexual Offences (POCSO), Amendment Act, 2019, and The Protection of Children from Sexual Offences (POCSO), Rules, 2020; Uniform Civil Code aser Forest Conservation (Amendment) Act 2023 atema pangzüng kar renema liasü.

Iba session nung Nagaland Municipal Bill 2023 tasen benok saka tajungba nung asadanga stakeholders ajanga den angatetetsü asoshi teshimtet committee ka nem nungloktsü.

Assembly Committee aser department balala indang osangtem iba senden nung agia liasü.

Kasa mapang senden amendang House nung telok balala aser department ketdangsur temi amalitep akaba asoshi Speaker-i pelaba lemsatapa liasü.

## Nagaland Municipal Bill 2023 asadangtsü Committee ka tentetogo

**Kohima, Rongjui/Sept. 14 (TYO):** Nagaland Municipal Bill, 2023 asadangtsü asoshi züngsem tenet Select Committee ka tentetba osang Nagaland Legislative Assembly (NLA), Speaker, Sharingain Longkumer-i Brehostibarnü sangdonga liasü.

Iba Committee nungya Deputy Chief Minister T R Zeliang convenor asütsü aser Ministers K G Kenye, P. Paiwang Konyak, N. Jacob Zhimomi, Metsubo Jamir aser Advisors Zhaleo Rio &

Mhathung Yanthan nungertem züngsem aser Secretary-in-charge of NLA, Khruohitunuo Rio ya member secretary alitsü.

Urban Local Bodies Election ya nüburtem asoshi rongdak ken o ka lir ta züngsemtemi jembiba sülen Nagaland Municipal Bill 2023 ya House nung Chief Minister Neiphiu Rio-i September 12 nü benoka liasü.

Ibai state sorkari September 1 nü lokti tentet balala den shisa agitepa senden amendang nangzükba ama inyaker alitsü.

Mongulbarnü legislator temi jembiba mapang iba Bill ya kanga junga asadangtsü asoshi teshimtet committee ka dangi abentsüla aser Act ka ama magizükdang lokti tentet ajungai molunga alitsüla ta angatetba lemsatapa liasü.

March 28 nung sorkari Nagaland Municipal Act 2001 agiena liasü aser lokti tentet balalai akhangba ama 33% women reservation aser ano ali aser ki o jen nungi saru agientsü dak rangloker ozüng tasen ka yanglutsü sangdonga liasü.

## Article 371A nung aliba ama state nung Forest Act amshitsü

**Kohima, Rongjui/Sept. 14 (TYO):** Indian Constitution indang Article 371A nung mela aliba ama state nung Forest (Conservation) Amendment Act 2023 amshitsü tanü Nagaland Assembly nung agizükogo.

Hombarnü Assembly nung iba ken o nüburtem asoshi kanga tongtipang lir ta jembishinü akaba sülen pangzüng ya renema liasü.

Iba pangzüng benokba mapang, The Forest (Conservation) amendment Act, 2023 ya Parliament nung agizük aser Government of India-i August 4 nü sangdong, ta Minister, Environment, Forest and Climate Change, C. L. John-i ashi.

Iba Act yagi talisa ali aser yangji aliba rongsen (arem) indang shia lir, aser iba Act nung Section tasen ka - (Section 1(A)(2) - inoksem, koba international borders, Line of Control mesüra Actual Line of Control nung kilometre 100 tetsüngta nung aliba arem nung linük asoshi aser national security asoshi tongtipang 'strategic linear project' inyakba nung amshitsü shia lir.

International borders nungi kilometre 100 yutsüra, iba yagi Nagaland State shilem tuluba

agitsü, aser Nagaland nung arem timba kin-kidong meyong lir, ta pai ashi.

Constitution of India indang Article 371 (A) nung "Iba Constitution nung shia liaka, Naga nung tamangba yimsü mesüra yimsü-yimpong, Naga customary law aser inyakyim aser Naga customary laws nung aliba ama civil aser criminal justice ketdangtsüba aser ali aser yangji aliba rongsen nung kibur mesüra kibur melentsü asoshi Nagaland indang Legislative Assembly ajanga pangzüng renema teletmetba ka magira Parliament indang Act kecha mamshitsü," ta shia aliba pai lephsia ashi.

State sorkari September 1 nü Forest (Conservation) Amendment Act, 2023 atema lokti tentet balala den shisa lemsatetpa senden ka ayongzüka amendang Naga Tribal Hohos/Organisations balala nungi teshimtet nübu temi Nagaland nung iba Act indang Section 1 (A)(2) amshitsü memolungba lemsatapa liasü, kechiaser iba Act yagi Nagaland nung akhi tetsütebou mapang nungi senmanga aruba arem aser yangji aliba rongsen amshiba nung timtem ajurutsü ta angatet, ta Minister

C.L. John-i lephsia ashi.

Article 371A nung 'land and its resources' ta aliba ya arem aser yangji aliba ali rongsen ta State Assembly-i angateter aser agizüka aliba Act indang Section 1(A)(2) Nagaland nung amshiba ajanga kin balala meyong arem aser yangji aliba rongsen indang temeden raksatsütsü ta angateter, ta pai ashi.

Constitution of India indang Article 371 (A) nung 'constitutional guarantees' agüja aliba ama state nung Forest (Conservation) Amendment Act 2023 ya amshitsü ta 14th Nagaland Legislative Assembly nung pangjema, ta John-i ashi.

State aser nüburtem nem timtem magütsütsüsa iba Act indang Section 1 (A)(2) nung shia aliba tzüzüng-ozüng mamshitsü ta GoI ajanga nangzükttetsüla, ta House nung pangjem.

Parnokisa nija mesüra nüburtem meyong arem tem 'non-forestry purposes' asoshi amshitsü atema aser lipajen raksatsüba asoshi arem amshirtemi temelen sen agütsütsü aser Central Government indang tang aliba scheme balala nungi teyari agitsü atema State-i pei sasep nung Act yanglutsü lenmang bushitsü pangjema liasü.

## Nagaland Assembly nung Bill ana - Anatomy & GST agizük

**Kohima, Rongjui/Sept. 14 (TYO):** Brehostibarnü Nagaland Legislative Assembly (NLA) nung voice vote ajanga Nagaland Anatomy Bill 2023 agizüka liasü.

Iba Bill ya kibur maliba tasümag aser pei temang shilem mozüki aser medical and teaching institute nem medical education mesüra anatomical examinations aser temang rangsaa research agitsü asoshi agütsütsü atema nisung ka masüdang temelaba agütsütsüba indang lir.

Minister, Health & Family Welfare, P. Paiwang Konyak-i iba Bill benokba nukjidong aser kuli rateta ashidang, mejangjatetba mesüra kiburi mashishiba nisung tasümag amshitsü asoshi tang Government of Nagaland atema ozüng kecha mali, ta ashi.

Pei sasa molungsoa tenük-telen aser tasümag, rangben mesüra shilem kar tenlatsü asoshi melaba ozüng shidak mali, ta pai

ashi.

Anatomical examinations aser temang rangsaa amshiba densema medical education aser research asoshi hospitals aser medical and teaching institutions nem nisung tasümag agütsütsü tali nungdaka kumogo, anungji item atema ozüng yanglutsü nungdaker, ta Konyak-i ashi.

Iba Bill ya ajanga State Government-i shimtetba ketdangsur temi mozüki, tepuokdak mesüra nüburtemi amshiba tesem nung kibur maliba nisung tasümag agitsü tashi agütsütsü aser nisung ka masüdang tenük kuli alir nisung ana mesüra tali lia tezüluba nung pa/la asüba sülen temang rangpen mesüra temang shilem kar tang shia aliba maparen atema agütsütetsü, ta Minister Paiwang-i ashi.

Kasa anogo Assembly nung The Nagaland Goods and

Services Tax (Seventh Amendment) Bill, 2023 agizüka liasü, koba Chief Minister Neiphiu Rio-i Mongulbarnü benoka liasü.

Goods and Services Tax (GST) ya July 1, 2017 nungi amshia arur aser yangji Central Goods and Services Tax aser State Goods and Services Tax lir, ta Rio-i ashi.

Central government-i Central GST Act, 2017 ya Finance Act No. 8 of 2023 ajanga amend asü aser State sorkaria 'corresponding amendment' ya State GST Act nung inoka amshitsüla, ta pai ashi.

Nagaland GST (Seventh Amendment) Bill, 2023 yagi Nagaland GST Act, 2017 ya tali tawajemba kumdaktsütsü, ta Rio-i ashi.

Speaker Sharingain Longkumer-i Bill ana ya motion nung benok aser voice vote ajanga agizüka liasü.

## Mokokchung nung Bharat Scouts & Guides nung ketdangsür tasen shimok



Mokokchung nung Bharat Scouts & Guides nung ketdangsür tasen shimokba sentong temer kelen lenir tasen shimertem aser BSG lenirtem kulemi tangokba noksa.

### Mokokchung, Rongjui/September 14(TYO):

Mokokchung District Bharat Scouts & Guides(BSG) nung ketdangsür tasen shimokba sentong September 14 nü Mokokchung Deputy Commissioner Conference Room nung agiogo.

Tanu iba sentong nung mapa balala nung tongti lenir yamai shimoka liasü.

1. District President BSG Mkg.- Wb.Thsuvisie Phoiji NCS DC Mkg.
2. District Chief Commissioner BSG Mkg. -Wt.Sentinenla DEO Mkg.
3. District Commissioner (Scout)

- Wb.Anguvito Sumi DSO Mkg.

4. District Secretary BSG Mkg. - Wb.Jonglemdong Lkr Sr.SDEO Mkg.

Tanu iba sentong nung ketdangsürtem tasen shimokba Wb.Imlisunep ASOC(S) Nagaland Kohima-I ketdangsüa agi aser Scouts aser Guides lenir balalai shilem agia liasü.

Mokokchung DC Wb.Thsuvisie Phoiji NCS-i tayongzüba o tatsüka jembidang England lima 1907 kum iba Scouts & Guides mapatong ya tenzüker kelen alima ajunga ayimsünga ao aser asen Naga lima tonga aruba mapang ka nung

Mokokchung district nung tama iba mapatong ya agizüka inyaker kelen Mokokchung ajanga iba mapa tajung ya Naga nung nem angazükdaktsüogota ashi.

Mkg. DC-isa Mokokchung nung iba mapatong ta tenzüka inyaker kelen joko 2025 kumjibo kum 75 ajungba Platinum jubilee amongtsüba lir, anungji iba mapangjibo Mokokchung nung Bharat Scouts & Guides züngsem aika kumer longso longsoa tajanzük ka-a mongtetsü asoshi school-tem nung kaketshirtem iba mapa tajung nung ya shilem agia senso tajung kaka kumdaktsüsü asoshi inyakdita ayongzüük.

## Green Ply Factory nung inyaker nem HIV/AIDS indang angazükdaktsü

**Dimapur, Rongjui/Sept. 14 (TYO):** Tizit nung aliba Green Ply Factory nung inyaker nem HIV/AIDS indang tali tejangjaba nung angazükdaktsüsü asoshi Nagaland State AIDS Control Society (NSACS) ajanga Labour Department den lungjemer sentong ka September 14, 2023 nü Green Ply Factory nung ayongzüka liasü.

Deputy Director (MS), NSACS, Ainato Yeptho lenisüba kübok iba sentong ya agia liasü. Iba sentong nung pai lokti dang HIV/AIDS aser sexually transmitted infections (STIs) indang tongmelang agi rateta ashi.

Item tashidak menatsü jenjang nung alirtem mapang shia tendangtsü kanga tongtipang, ta pai ashi aser HIV keta alirtema treatment aser mozü shidak agira arishi talangba aser tajungba alir, ta Yeptho-i ashi.

Joint Director (IEC), NSACS, Metevinuo Sakhrie-i HIV aser AIDS dak sendakba nung nüburtemi metsük-mokonga bilemba aser sensamasa amshiba indang tebilemtsü lemsatapa liasü. Laisa HIV & AIDS (Prevention & Control) Act of 2017 indanga jembia.

Assistant Director (Doc), NSACS, Chongkoi Khaming-i HIV tendangba tajanzük, talisa

mashisa aliba tetsürtem tendangtsü aser kera putettsü aser anepalutsü indang jembia liasü.

Loshon Konyak, TB/HIV Supervisor ajanga mapang shidak nung tuberculosis (TB) tendanga mozü agitsü indang jembia liasü.

SDO (C) Tizit, Tumben P Tsanglao, NCS ajanga tajungshi o jembidang iba sentong nung temolung agüja adentsü aser maongka agia pei kumzüka alitsü angazüksü ashi.

Labour Department nungi Chingkhap Konyak-i tarur pela agizükba o jembia sentong tenzüker aser pei sasa molungteta HIV aser TB tashidak tendanga iba sentong tembanga liasü.

## Mokokchung nung District Level Youth Festival alitsü

**Dimapur, Rongjui/Sept. 14 (TYO):** Mokokchung District nung arishi küm 16 nungi 29 tsüngta lanurtem asoshi District Level Youth Festival alitsü, ta District Youth Resources Officer (YRO), Mokokchung ajanga September 13, 2023 nü sangdongogo.

Iba benjongmung ya lanurtem sempet, sobaliba benjongtsü asoshi lir, kong Folk Song aser Folk Dance nung tetoktepba alitsü.

Iba benjongmung ya Mokokchung nung amungtsü.

Tetsü-tebou ken (Folk Song) tetoktepba nung shilem agir telok shia tajemba agi nisung trok aser timba agi nisung ter alitsüla.

Sobaliba tsüngsang (Folk Dance) tetoktepba nung shilem agiba telok shia tajemba agi nisung 10 aser timba agi nisung 15 alitsüla.

Folk Song Competition asoshi 1st Prize sen 3000 aser 2nd Prize sen 2000 alitsü. Folk Dance Competition nung 1st Prize sen 5000 aser 2nd Prize sen 3000 alitsü.

District Level nung takok angurtem Mokokchung District tenüng nung Youth Festival, Kohima nung shilem agitsü maongka angutsü.

Iba tetoktepba nung shilem agitsü janra aliba Clubs aser Society temi Office of the District Youth Resources Officer, Mokokchung nung September 20, 2023 tashinung registration agitsüla. Iba dak sendakba nung tali tejangjaba metettsü asoshi Mobile number 7005685477 aser 8798437988 nung tongteprateptsü akok.

## Taruba financial year nung Foothill Road...

State sorkari iba maparen asoshi sen lenmang maneni bushir aser parnoki senotsü magütsütettsü ta indang-indanga ashi asübo state sorkari 'loan component' densema danga lenmang repranger lila, ta pai ashi.

Saka Union Minister-i nangzüka lir, anungji project atsülanger, ta ashi.

September 2022 nung pangzüng renemba ama state sorkari temolung agüja bushir, saka state nung rongsen mali aser Union Ministry ajanga nangzüka

silena senotsü magütsür, ta Rio-i ashi.

Ministry ajanga senotsü magütsüra taruba financial year nungi state sorkari sen bushia iba project asen sasa tenzüksü merangtsü, ta Chief Minister-i ashi.

## Nagaland Chief Secretary-i coffee table book ka sayaogo

**Dimapur, Rongjui/Sept. 14 (TYO):** Chief Secretary Nagaland, J Alam, IAS den Director IPR, Dzüvinuo Theinuo, aser Joint Secretary IPR, Kusa Fithu nungeri 'Inspiring Transformation Nagaland B20 Meet' nungja agütsür coffee table book ka sayatsüogo. Iba kaket sayaba sentong ya September 14, 2023 nü Chief Secretary Conference Hall Kohima nung agia liasü.

Iba coffee table book nungya Kohima nung B20 sentong agidang tangokba noksa tem lir. Iba kaket ya B20 sentong indang 'visual record' ka amai lir.

J Alam-i iba kaket sayaba sentong nung jembidang, Nagaland aser North Eastern region ajunga terenlok asoshi public aser private sector tem

tsüngta tesendaktep tajung aliba tongtipang ta iba kaket yagi asenok dang ashir, ta ashi.

Commissioner & Secretary, Kesonyu Yhome, IAS ajanga o tatsüka jembidang, B20 senden ajanga state nung maongka zünger mezüngmai alibatem bushitetsü asoshi merangtsü tejangraba milak jangrudaktsür, ta ashi.

Iba kaket azünger tem dak iba tanüla milak jangrutsü ajungmesotsü imlar, ta pai ashi.

Nagaland nung April 4-6, 2023 angotem B20 senden pezübuba aser tatembangba ayongzüka agiba indang 'visual documentation' ka ama wazüka ayutsü nükjidong nung iba coffee table book ya Directorate of Information & Public Relations (DIPR) ajanga adoka liasü.

## Old Age Home nung alirtem angati tenük repranga



**Kohima, Rongjui/Sept. 14 (TYO):** Naga Hospital Authority Kohima (NHAK) nung Eye Department ajanga September 13, 2023 nü Old Age Home, Meriema nung alir teintet rogotem tenüng angati repranga 'spectacles' agüja liasü.

Meriema nung aliba Old Age Home ya Good Samaritan Women Society Kohima ajanga

anepalur. National Programme for Control of Blindness and Visually Impaired kübok 38th National Eye Donation forthright bilemteta iba sentong ya agia liasü.

NHAK nungi Innapokim, (Eye specialist), Dr. Megono nati anir iba sentong ya agia liasü.

## Aluyimer dang Aquaculture yimya tasen sayu



**Dimapur, Rongjui/Sept. 14 (TYO):** Niuland district nung aliba aluyimer nem Non Residential Training program ka Department of Fisheries and Aquatic Resources, Nagaland ajanga Brooder Fish Farm, Half Nagarjan Dimapur nung ayongzüka agia liasü.

Iba asemnü training ya September 11, 2023 nü tenzüker aser September 13, 2023 nü tembanga liasü.

Iba training mapang aluyimer dang National Fisheries

Development Board during FY 2023-24 ajanga senotsü teyari agütsüba PMMSY kübok 'Modern techniques of Composite Fish Aquaculture and integrated system' indang sayua liasü.

Iba sentong nung yimtsüng pongu nungi ango metsür nisung 25 dena liasü.

DFO, Dr. Amenla ajanga ango metsürtem dang KCC aser CMMFI indang rateta ashi, kong shisalen sayur AFIs Temjensoba aser Theja liasü.



September 14, 2023 nü Bina nung Ato kilonser Narendra Modi-i petrochemicals complex atema project tenzüksüdang tangokba noksa nung angur. Kasa noksa nung Union Minister for Petroleum & Natural Gas, Hardeep Singh Puri aser Madhya Pradesh Chief Minister, Shivraj Singh Chouhan nata angur.

### Parliament nung sorkari bill pezü benoktsü sangdong

**New Delhi, Rongjui/ September 13 (Agencies):** Bodhbarnü Centre sorkari September 18 nungi September 22 tashi ayongzüka aliba Parliament temeja senden nung benoktsü atema bill pezü sangdongogo.

Bill pezü rongnung ana- The Advocates (Amendment) Bill, 2023, The Press aser Registration of Periodicals Bill, 2023 densema lir. Bill ana ya taoba ita August 3 nü Rajya Sabha nung agizükogo aser Lok Sabha senden nunga benoktsü.

Ano külen Rajya Sabha senden nung Post Office Bill, 2023 aser Chief Election Commissioner and other Election Commissioners (Appointment, Conditions of

Service and Term of Office) jakdang sorkari September 17 nü party ajak senden ka ayongzüko.

Union Parliamentary Affairs Minister, Pralhad Joshi-i e-mail ajanga opposition party ajak nungi lenirtem dang iba senden nung adentsü metetdaksüogo.

August 31 nü Prahlad Joshi-i September 18 nungi 22 tashi Parliament temeja senden amentsü osang metetdakja liasü.

Osang angazükba agi, sendenji Parliament building tejenba nung tenzüksü aser tasügnü nungi Parliament building tasenba nung amentsü. Iba anogoji (September 19) Ganesh Chaturthi benjung anogo lir, aser iba ya temeshi anogo ama züngshir.

Parliament temeja senden

### Union Minister VK Singh-i alima dang Pakistan sendoktsü mepishir

**Indore, September 14 (Agencies):** Jammu & Kashmir nung kiralongrartemi sepai ketdangser ana densema sepai pezü khasetba sülen anogo ka lir Bodhbarnü Union Minister, General (reted.) VK Singh-i alima linüktem dang Pakistan sendoktsü aser kiralongra anema inyaktüsü ayongzüko.

Bodhbarnü Kashmir kübok Anantnag district nung kiralongrartemi Jammu & Kashmir deputy superintendent of Police ka densema khaseta liasü.

Indian Army Colonel ka aser Major ka den Jammu &

Kashmir Police DSP ka densema injang agi yiruba sülen meküzmükteti süogo.

B r i h o s t i b a r n ü osangbenertem den jembidang Union minister-i, Pakistan-i yimya memelenshi tashi linük ana tsüngda tesendaktep majungtsü, ta metetdaksü.

"Asenoki shisadangtsüla. Alimai Pakistan mesendok tashi parnoki iba ya yimya ka dang, ta bilema arrtsülen nungi kiralongratsü. Asenoki alima linüktem dang parnok (Pakistan) sendoktsü atema ajungshitsüla. Parnoki yimya memelenshi tashi linük ana tsüngda tesendaktep majungtsü," ta taoba mapang

Mongolbarnü sepaitemia Rajouri district kübok Narla area nung kiralongrar ana khasetogo. Sepaitemi raraba tesem nungi raraba hadir, mozü aser Pakistan nung temaitsütem ngutetogo, ta police ketdangsertemi metetdaksü.

Army tongti, General VK Singh-isa metetdaksü.

Mongolbarnü sepaitemi kiralongrartem anema operation tenzüka liasü aser Bodhbarnep kiralongrartem den raradang Colonel Manpreet Singh, Major Ashish Dhonak aser DSP Humayun Bhat nungeri taküm tenla agütsü.

Mongolbarnü sepaitemia Rajouri district kübok Narla area nung kiralongrar ana khasetogo.

Sepaitemi raraba tesem nungi raraba hadir, mozü aser Pakistan nung temaitsütem ngutetogo, ta police ketdangsertemi metetdaksü.

### Kerala nung tang tashi nung nisung 5 dak Nipah virus putetogo

**Thiruvananthapuram, September 14 (Agencies):** Kerala nung ano Nipah virus putetba sülen state sorkari iba tashidak nokdangtsü atema telemeteba aika agia inyakdar.

State kübok Kozhikode district nungbo iba tashidak agi nisung ana asüba jangiangogo.

State nung Nipah virus azüoktsü atema sorkari committee 19 tentetogo aser tang tashi nung nisung pongu dak iba virus putetogo.

Bodhbarnü Kozhikode nung ano nisung ka dak iba tashidak putet.

Osangbenertem den jembidang state Health Minister Veena George-i, "Tang tashi nung samples asem Nipah positive putetogo (nisung ana asüba mezüngsem). Onoki contact tracing tenzüko. Contacts 706 nungi 77 bo high-risk category nung lir aser health workers 153 low-risk category nung lir," ta metetdaksü.

Laisa, state nung iba virus azüoktsü atema Kerala sorkari committee 19 tentetogo, ta ashi.

"Onoki telemedicine facility tenzüko. High-risk category nung alir shinga dak-iba virus temaitsütem mali," ta lai metetdaksü.

"Asürtem oli-oraba map

sangdongogo. High-risk category nung alirtem dang pepei kidang nungi mayazüksü metetdaksür. Parnok dak iba tashidak temaitsü lira parnoki call center den tongteprateptsü akok," ta lai ashi.

Laisa, "Parnok dak iba tashidak temaitsü putetra pa/la medical college-i anir aotsü," ta ashi.

Minister-i, "Contact list nung alir nisung 13 medical college nung mongdar aser parnok temang junga dang lir. Pei kidang nungi mayazüki amongertemi volunteers teyari agitsü akok. Panchayats-i volunteers shimtsü. Hospitals nung isolation takdang aika renemtsü," ta metetdaksü.

September 24 tashi district collector-i Kozhikode district nung lokti senden ajak nokdangtsüla.

Health Directorate office nung state-level control room ka amenokogo aser tanü State-level rapid response team senden ka menogo, ta laisa shisem.

Tamalen ketdangsertemi nisung pezü dak Nipah virus putetba metetdakja liasü aser nisung pezü rongnung jagi nisung anabo tesüiba hopta ana tsüngda süadokogo.



September 14, 2023 nü New Delhi nung 5buba Auto Retail Conclave sentong nung FADA Tir, Manish Raj Singhania (abelen)-i Union Minister for Road Transport & Highways, Nitin Gadkari nem nungo ka agütsüdang tangokba noksa nung angur.

### MP nung kiset shiruru chiyimdaktsüba nungi rara adoka nisung 5 asü

**Datia, September 14 (Agencies):** Bodhbarnü telok ana khatempa raradang nisung pongu asü aser ti yiruogo; Madhya Pradesh kübok Datia district nung kiset shiruru chiyimdaktsüba nungi mangatettep adoka rara tenzüka liasü.

Anogo asem jakdang Dangi nung aser Pal nung tsüngda mangatettep adoka liasü aser telok anapronglai police station nung ken o agüja liasü.

Iba mapang nungji yimyak yimsüsürtemi iba mangatettep ken oji tajungtiba nung bentetsü atema senden ka ayongzüka liasü, ajisüaka senden metenzükdangyongi rara adoka parnok tsüngda khatepdang nisung pongu asü.

Kasa rara nungji nisung ti yirua hospital nung medical treatment agidar.

Bodhbarnep 9:00 ako meta Randa yimyak rara tenzüka liasü, ta Datia district superintendent of police, Pradeep Sharma-i metetdaksü.

Tesem ka nung kiset shiruru chiyimdaktsüba nungi Prakash Dangi aser Pritam Pal na tsüngda mangatettep adok. Tejashi nung Prakash-i Pritam dak maloktsü, aser iba nungjagi yim ana tsüngda rara adok.

Bodhbarnep yimtsüng anati iba mangatettepji bentetsütsü atema yim tezülen adenshia liasü, ajisüaka lokti nungjagi nisung kati injang khaloktsüba nungi khatep tenzüka liasü.

Gwalior-Chambal region kübok aliba yimtsüngtem nung mapang shia prangpong amshir.

Tensa azüoktsü atema tangbo iba tesem jagi police aika yoka lir.



September 14, 2023 nü Kerala kübok Kozhikode nung Health worker tem Nipah Virus atema amenokba control room ka nung angur.



## TIR YIMYIM YIMOBILEM (EDITORIAL)

DIMAPUR ROGONÜ, RONGJUI (SEPTEMBER) 15, 2023

### Asenoka kechisa jembir ya ?

**Y**akanü Nagaland tatar senden nung Wokha district nung arem shiti adoka alu aser kiojen raksatsüba dang masü saka nisung dena tepsetba lendong aser shisabolu indang jembir dang, yimsüsür kati shitii nisung tepsetba indang kecha aria mebilemtsüi asayamenüa jembiba o ji, atangji, meimchir mulungjang nungi adokba yimten yimsüsür o memesük, taoksatsüka, tejashitsüka aser tesasatsüka angaogo. Atangji, arem shiti yimtaki adoka nisungtem amokmerenba aser nisung ajemseta endokba lendong indang jembitsübaji temenünütsüka masü saka temulung ashitsüka aser shisabolutsüka lir. Aji tajurur aser tajangshirtemi dang tajungba metettsü. Anungji, tatar senden nung iba ama onükji tejembila jembir, kechiyong arem shiti nokdangtsübaji mapa temela masü aser government-i dang nokdangtettsü aser alu aser kiojen raksabatem asoshia government-i temenok agütsütsüla aser nisung taküm samaba takoksa indangjia temenok ta mesüaka asür kinungertem mulung anisüngzükja senotsü teyari agütsütsübaji government mapa lir. Item ajakji inyaktettsüsa government ket nung sentong aser tashi lir. Ajisüaka, tesama aser takoksa ajururtem mulung süngzükja tesünap o ka shir, ano teyari agütsütsü nangzükür külenang tarutsü nung arem shiti lendong nungi nübortem kümzüka yutsütsü asoshi asa-lentong kar lemsateptsü melen, arem shitii nisung tepsetba dang nungibo nisungiang arem shiti teimba tepsetbaji takok-ang tulu angu ama yimsüsüri tatar senden nung jembira, nübortem asoshi arem shiruru nungia tejenokdak makatsüsa shisaboluang tali kümdaktsür asütsü. Tanü Nagaland tia makabaji alima rongsen makaba timtem masü saka shisatsü aser ochi agi anungba tebilemtsü lir. Shisatsü agi dang pei nübortem tia, shisabolu aser nungdak reprangteter aser itemji shisa taka o jembia, o agi ochi mapa küma nübortem anisüngzükdaktsür. Item shisatsü aser ochi mapatemji nübortemi yimsüsürtem dang nungi imlar. Ajisüaka, nübortem timtemba tia aser nungdak reprangteta shisa tajung bendena itemji akoktsü meranger masü, tatar senden nung nübortem timtemba otsü agi mayakoya jembia asayamenübaji shisa tenük melapok ngasangatemba mapa ka asütsü. Atangji, tejembiri meshitak jembio ta angateta tadok meshibaji junger, iba jagi nisung ajak nem tangatettsü shisa tajung ka agütsür asütsü. Atangji, yimsüsürtemi pei nübortema nümamedangtettsüsa yimjak nung jembibaji tang ya dang masü saka tamalena karibo Naga nunger nem center government nungi relief jang yokba ya Naga nunger asoshi tenüng tajung tuluka amai bilema jembiba angashiogo. Ajisüaka, tang tashi Naga nunger center nem relief jang agi mesüdaktsübaji konangbo masü saka taaktsüka bilemtsüla. Aji oda, kodaser center nungi relief jang meshia mechiyongi asenoksasa tebok sünga alitsü ta bilema sentong tajung yangluba indang jembir masü saka Naga nungertemibo center nungi yokba relief jang dang Modibai yokba jang ta tetshia Modi government tenüng sanga dang alir ta yimsüsüri tuluka ama bilema masamasaa jembibaji, Nagaland tejakleni anitsüba shisatsü aketba o ka masü saka teti tangar dak nendaka alitsü sayuba lenmangang ka asütsü. Atangji, asen lima nung yimten lenirtemi jembiba o tem angadangra, tang amaji peisasa pei alutsüsa jembiba aser kari kar aitsüa jembiba dak alaka asen lima renloktsü atema shisa tasen (new idea) bener arua lemsatepbabo kangabo mangashir. Aji oda, yimsüsürtemi shisa tasen den mapa tasen angazüka bener arua sentong tasen atongteta inyakba takok otsü jembir masü saka government senpong nung sen makaba aser tamakok anguba indang kisüng pei nübortem den jembiba agi nübortem nem teimla tasen ka agütsür masü saka tangatetba aser teimla tilaba küma tezüdangdaktsür. Iba jagi nübortem tebilemba, tangatetba aser mapa nung tejakleni aotsü melen peisasa pei agi nümamedangtettsüsa nisunga masü amai bilemdaktsür. Joko, asenoka tebilemtsü aser tamakok agi asayamenü aser tangar nungsen mekümdaktsüi, peisasa pei khuret aser mapa meteta inyakba takok aser teimla otsü jembir tenzüki.

## OLEMSABANG

### TIPU TENEM TSÜNG NUNGI NARING APEN AMA

~ Süpongñüsang Longkümer,  
Darogapathar Dimapur

Aki tsürapor otsü Tipu tenem ya asür yimti ta ja liasü. Tsüngküm mapang January, February nung asür sü pu-a ta mesüng mesünga pudakasa angu tanü asünga angur mangur- ar mereprangtanger. Iba tenem ya Wokha tenem aser asür süpuji temeyip len lir. Naring atangwa iba tenem tsüng nung arem Naring kibur mali tesüngmangtsü atanger ta angazük. Tsürapor kar iba naring nüji reprangtangi ao, jembiba ama naringji liasü anungji parnok jangratema chir ano aika ongzüka penür kidangi apusua jajapet jajali mezüng naring achiba tesüm pongzükli ta jajatang metemeri iba naring apenpo yamaisa asür-a ta angazük-ar indokti ta jembir indoker apusu nung idangji ang naringnüji doktsü-a ta otsü ashiba bilemtetter.

Ao lima nung Yisu asutsü asoshi shimtetba Bethlehem 22.12. 1872 koba nung teti o tenu na mebilae külemi lia asu iba nung nena tang temoatsü angu masü nena ajanga Aor yimkong atener kümdaktsü ajisür külen Nagalima ajak tatener aküm aser abenjagi Nagalima khrista meyong aküm. Nena tejen tasen ta mejimbidang anungji shibapo matena ta shitet asen kija temetetter aser tangatetter masü, temetetter aser tangatetter aika lir. Anungji temulung ojang shirang napo maten papo maten ta shingaia mashir angajemaogo joko temulung süngjema anisüngzükangma aji mesüra okadaki maoyonga Aor ajak ola adoktsü ana nung lir. Tsüngrem Tsüngrem ta jembiba ya Kotak aser alima pa meyong anungji ajak nung Pa Impur Paji tasutalir anungji Impur limaji Tsüngrem yimti jatsü YIRUSALEM mesük iba nungi America missionary aika lia Ao lima ya ochiba ajanga nüji kümdaktsü süra Impur office nung kecha zülua maka no? Aor missionary Impur nung alirtemi Ao limai khrista osang koma aru otsü mangashe ama Kechiba küm 150 tema süiaka Ao lima nung khrista asuba tang tashi Tipu tenem nung naring penür apusu ama aseni mesütetba burtem dang taktsüka parnok dak alema temetetter tangatetter mali no! Government mapai aitsü atemapo küm sükdoker aitsüsa tain kümer ang schooling aküm nungji aji mesüra shinga mapa mangutsüsa liasü. Anungji küm temdoker certificate yanglu saka tasuba tesempo memelenshitet Tanü tensa nungpo lanurtem ochishir-a alitsü akok saka yakta schooling tenzükerji küm temloker mapai aitsüsa akümer (Temdokba aser temlokba kecha tependang mali)Khrista akizükba yimtsüng nungi küm pezü (4) lir külen ang yimseni ao nung tang tashi mesüngjemetetter no? ta aksetta bilemer, Aori mangatetra asen dak nungi nüpu ajongertem lir. Ibai raktepba agi sempet palaka mangutsü ibai alima yimli masü taküm Tsüngrem yimli anungji Tsüngrem peladaktsüti arungma. Ajaki angatetta lir asünung tatsü agi Tsüngrem tenüng nung sangoktsür. Tsüngremi moajang.

**Iba Olemsabang nung lemsaba ken-o aser shisatsü ya iba ocet züluri  
bilemba ken-o ama tazünger angateta agitsü mepishir**

## Arogo lenirtemi pastor 100,000 nem training agütsütsü lemtet



Tan ita tetenzüklen Zurich, Switzerland nung Khristan Ministry balala nungi lenirtem aser pastor tem FINISH Europe senden nung adendang tangokba noksa nung angur.

**September 14, 2023:** Taoba hopta Zurich, Switzerland nung ministry balala nungi lenirtem aser pastor tem 400 shi FINISH Europe senden nung aden, aser iba senden nungji parnoki taruba kum 9 tsungda pastor tasen 100,000 nem training agütsütsü telemtetba agiogo.

September 4-6 anogotem nung agiba senden ya Global Church Network (GCN)-i ayongzük.

2017 kum GCN-i Wittenburg, Germany nung aliba Martin Luther indang leper nung FINISH 2030 tenzuka liasü. Iba mapang nungji Khristan telok balala nungi lenir 600-i Kibubai tenyaba wadang longjemer inyaksü tenangzükba agia liasü.

FINISH Europe Summit nungji GCN tentetsang aser Tir, Dr. James O. Davis-i Europe nung Christian hubs 640 tashi amenoktsü aser taruba kum 9 tsungda pastor 100,000 nem training agütsütsü benoka liasü.

Pai, "Alima nung Arogo tasen amenoktsü atema kanga asakba tesemtem rongnung Europe nunga linük kar lir. Akhidang nungi agiba training yimya aser toklang ministry atema training ya tang alima nung Khristan Arogo ainba den mesütep kumogo, aser ibaji ajanga training agia aliba pastor tem aser ministry lenirtem agi meperir," ta ashi.

FINISH European summit nung lenir 19 lenisüba kübok senden trok agia liasü.

Iba senden nung adenertemisa Khristan global hubs aser Global Church Divinity School (online) ajanga ministry lenir 110,000 nem training agütsütsü lemtet.

Iba senden nung Drew Theological School, Drew University nung professor, Leonard Sweet-i iba senden nung adenertem dang Khrista osangtajung proktsüji asenok teinyaksü mapa lir, ta nenshia metetdakja liasü.

"Arogotem aikati parnok indang mission mapa melenshir, kechiyong parnoki Yisu Khristai parnok nem agütsüba mission aginer. Alimai asenok ajak

osangtajung proktsü atema ajar," ta paisa ashi.

Davis-i, 2030 kum June 9 nungi June 11 tashi Yirusalem 2030 Summit agitsü, aser iba mapang nungji Arogo tentetba sülen kum 2,000 ajungba atema benjungsü, ta metetdaksü.

Paisa, mezüngbuba Pentecost nung nisung 3,000 kumzükba atema akhüm agütsütsü asoshi GCN-i lenir 3,000 jaoktsü, ta metetdaksü.

Dave Roever Evangelistic Association tentetsang, Dave Roever-i, "Asenoki timtem ajangshiba jenjang ajanga asenoki tenyaba wadang ataloktsütsü atema koba tashi inyaktetsüar jangjatsü. Iba wadang inyakdang nisung kari nü melung yirutsütsü aser kari na anema inyaksü. Ajisüaka asen Kümtetdakba Yisu Khrista timtemba tarakji asenoki aremtsü atema asenoki melungtettsüla," ta ashi.

Joshua Project ajanga ashiba agi, tang alima nung Yisu Khrista osangtajung mangashibapur telok 7,400 shi lir.

2018 kum Barna report ajanga ashiba agi, United States nung Tenla kidangi aoer shilem 51-ibo Khristai tenyaba wadang indang memetet.

2017 kum American Culture & Faith Institute-ia, America nung Arogotemi Khrista osangtajung proktsü atema tongti süa meinyaker, ta metetdakja liasü.

Osangbener den jembidang Abuja, Nigeria nung Afri-Mission & Evangelism Network Tir, Oscar Amaechina-i, alima nung osangtajung proktsüji Khristantem ajak longjemer inyaksü mapa ka lir, ta metetdaksü.

"Khristai iba tenyaba wadang magütsüadang, ibaji takoktsü mapa ka, ta Pai meteta liasü aser asenok dang pai asenok mesendoktsü, ta shiogo (Mathi 20:20). Tashi khenyongi mangadang nungibo menor asüyonga tashi angabajisa tajungba. Khristantem ajaki inyakba ajanga alima nung meimchir ajaki Yisu indang angashitsü," ta pai ashi.

## ANOGO ABEN TSÜNGREM DEN

### Dawid asoshi ki ka

#### T.ken 132:11-18

Tsüngremi chuba Dawid dang pa ki ka asütsü memela. Iba melen Tsüngremi Dawid asoshi ki ka sütsü. Tsüngremi ashi, "Dawid, ni ne temang asoshi ki ka mesütsütsü saka nübur asoshi ki ka sütsütsü. Idakji na nungi jakzükba ka teti Israel chuba menden nung alitsü".

Pai ano Dawid chirtem asoshi langka ashi, "Ne jabasotemi kü tezüngzüktepba aser kü kulitem koba Ni parnok dang sayutsü aji beshidi süra parnok jabasotem ne chuba menden nung teti mendaktsütsü. Kechiyong Kibubai Zion Pa talidak asütsü Pai aji aginü". (t.12,13). Idagi Tsüngrem chirtem asoshi teinyaksü ka lir. Pai alima meyangludang Khrista nung asenok shimtet (Ef1:4) Yisui ashi, "Nenoki ni shim masü saka ni nenok shim" (Yn15:16). Koda Temeshi maongka tulu !

Asenok Tsüngrem chirtem asütsü shimtetta liasü. "Temeimbatem, dang asenok Tsüngrem chirtem lir, aser tesü asenok kechi asütsü ano jungkai madok. Pa jungkai adokdang asenok pa ama asütsü, kechiaser Pa komama lir aji oda asenoki pa angutsü, aji asenoki metet". (1Yn 3:2). Koda tesümgangtsü tajaba! Pauli ashir asenoki taküm nung yimsü asütsü (Rom 5:17). Tsüngremi asenoki taküm nung chuba ama yimsü südaktsüner.

Asenoki tashi angaba aser temeshiba ajanga yimsü asür. Tsüngremi pa sentsüwangshi asoshi asenoki temeshiba nung yimsü südaktsüner. Kechiaser Yisu Khrista nung tamang ajanga asenok pa chirtem lir, asenok kotak nung Khrista den amen. Anungji asenoki tekümtet sopudi. Asenok tepela asoshi ayimtendi.

Kenü tamangertemi Khrista den pa yimli nung yimsü asütsü. Saka tanü pai taküm nung yimsü asütsü na aginer. Nai Khrista den yimsü asür asü? Nai Tsüngrem o nung tashi angadang aser ne mulungjang merüka ayudang, na chuba ka akümer. Taküm nung ne tanelaren teküpbok jenjang nung teli. Chuba ka süang.

## Voice of Martyrs (VoM)-i Pakistan nung Khristantem yarir

**September 14, 2023:** Taoba ita Pakistan kübok Jaranwala nung Muslim nungertemi longkak aita Tenla kitem aser Khristan kitem rongdoktsüba sülen tang Khristan melungtet telok Voice of the Martyrs (VoM)-i Pakistan tesem balala nung jenshia aliba Khristantem yaridar.

August 16, 2023 nü Pakistan nung Punjab province kübok Jaranwala nung Muslim nungertemi Tenla kitem rongdoktsü, Khristantem kidang nungi auya aser ki 300 shi rongdoktsüba den külemi Khristan leper ka raksaja liasü.

Pakistan nung VoM züngsemtem Jaranwala-i oa Khristantem melung süngzüktsü aser teyari balala agütsü, ta VoM-i sangdong ka ajanga metetdaksü.

Parnoki Khristantem aser pastor tem nem chiyungtsü aser tejenokdak agütsü.

VOM otongdar, Todd Nettleton-i, "Iba lendong nung takoksa angur kibongtem nem teyari agütsü front-line workers ajak atema sarasademjang. Iba rara nung takoksa anguba Khristantem nüngdak peritsütsü atema sarasademjang. Sorkar lenirtemi Khristantem kumzüktsü aser aibelenertem nem temerenshi agütsütsü atema sarasademjang," ta mepishia metetdaksü.

VOM indang Global Prayer Guide nung Pakistan ya sorkari pusema Khristantem amokmerenba mesüra Khristantem anemba ozüngtem aliba linük ka lir, ta shia lir.

Pakistan nung ner nütsüng

shilem 98 shi Sunni aser Sufi Muslim nungertem lir aser tanünga nütsüng shilem 2 ji Khristantem lir.

Khristantemji kiyong telemsa balala nung alir aser teküboktiba mapa inyakerem lir.

Taoba ita raraba mapang jenshir Khristantemji tang sorkar school tem aser kinüngertem kidang jenoka lir.

Pakistan nung Khristantem anema inyakba sülen bill ana agizükba ajanga Khristantem aser lokti tentettem shisabulur.

Criminal Laws (Amendment) Act 2023 ajanga Tsüngrem mezümgmeshiba ozüngtem kübok aibelenertem nem ano temerenshi tesashiba agütsütsü.

Meimchir temeden atema inyakba organizations aikati

Pakistan linük nung Tsüngrem mezümgmeshiba ozüngtem aitsür, kechiyong iba ozüng kübok Khristantem densema minorities anema inyaker.

2020 kum nungi 2022 kum tashi nung Pakistan nung Tsüngrem mezümgmeshiba ozüng kübok nisung 463 nem tai tongloktsüogo, ta Centre for Social Justice-i metetdaksü.

Aso 19buba mapang Pakistan nung tamangba yimsü balala tsungda rara nokdangtsü nükjidong nung British sorkari mezümgmeshiba Pakistan nung Tsüngrem mezümgmeshiba ozüng ya benoka liasü.

Iba sülen 1980s mapang nung mitkar yimsüsür General Zia-ul-Haq kübok Pakistan nung Tsüngrem mezümgmeshiba ozüng tesashiba benoka liasü.

AO OSHI ANGAZÜKDAK: TANÜ ANGAZÜKTSÜBA OJANG



Saktsübokshi

(n) saktsüa tepoki oa shirangba wara (dysentery)

\* Chiyongtsü mashimashi achiba ajanga saktsübokshi agi atonger.

Saku

(adj) kasa (same)

\* Mapa tajung ajak nung asenok saku asütsü merangtsüla.

OLONG PAITEP # 6637

Grid for crossword puzzle #6637 with numbers 1-19.

TIPIEN

- 2. Teburtemi tejak nung awaba
6. T \_\_\_ em
8. Tzük ayudak
9. Nüngdakba dang timba
11. Züina ao
12. Yangi tzü angur
14. Tangar dang nungi tali
16. Senyong masü
17. Oadokdi
18. Tzü tarok
19. Yimtaklir aikati iba ya ki den külemi yanglusemer

LANGTSÜNGLEN

- 1. Temejangdak
3. Nisung ka mapa inyaksü nübo
4. Azüntsü asoshi mejemba
5. Tesangwa agütsüba
7. Tila masü
10. Tebenjem tetsür chanu
11. Tekolak nung inok
12. Tetsüngda
13. Tangar inyakba ka inyak
14. Tim masü ta ashi
15. Asalendong
16. Tanü dangtsü

OLONG PAITEP # 6636 TELANGZÜBA



TIPIEN :

- 1. Telok, 4. Aluru, 6. Ozüng, 8. Emk, 9. Kin, 10. Teti, 12. Süir, 13. Jen, 14. Ola, 16. Talak, 17. Mazük.

LANGTSÜNGLEN :

- 1. Tenükjang, 2. Luden, 3. Kiochtsü, 5. Lenti, 7. Tajangzük, 11. Teronem, 12. Sempa, 13. Jahaz.

Agüja aliba noksa nung meputepi aliba bushiang



Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Meghalaya nung NEP benoktsü atema sen crore 500 shi nüngdaksü: CM Sangma



Conrad Sangma

Shillong, Rongjui/ September 14 (Agencies): Meghalaya nung national education policy (NEP) benoktsü atema sen crore 500 shi nüngdaksü. Iba osang ya Meghalaya chief minister Conrad Sangma-i Bodhbarnü metetdakja liasü. "NEP benoktsü atema sen crore 400 nungi 500 shi aotsü," ta Meghalaya CM Conrad Sangma-i ashi.

Paisa, "iba plicy kübok college tem nung course balala

agütsütsü ayongzükogo aser iba atema infrastructure aser rongsen talila nüngdaksü," ta ashi.

Shillong Laban Bengalee Boys' Higher Secondary School centenary benjungmung shibangba sentong nung o jembiba mapang CM-i iba olen lemsatap.

Taoba mapang Meghalaya chief minister Conrad Sangma-i ashiba agi, Meghalaya nung NEP benoktsü atema rongsenketzung nung

tetsükdaksü tulu aliba ajangtsüsa akümtsü.

Pai ashiba agi, "tetsükdaksüji tangsa tang benoktsüba ya lir. NEP atema multi-disciplinary subject tem nüngdaker aser college tem nung department tasen tenzüktsü nüngdaker, koba atema senotsü teyari nüngdaker. Science wing tenzüktsüba atema parnok nem shibai sen agütsütsü? Shibai college tesayurtem itasen agütsütsü? Ki asütsü atema shibai senotsü agütsütsü?"

"Anungji NEP benoktsü atema senotsü aika nüngdakba ajangtetsüsa akümtsü," ta Sangma-i ashi.

Pai, Centre-i senotsü magütsütsü, saka college tem nung infrastructure yangluba nung state tem nem teyari agütsütsü, ta ashi.

"Senotsü inyakteptsü nüngdaker," ta pai shisem.

"Shingaia NEP manemer, tesayur, principal aser kaketshirtem timba kati NEP benokdaksüner. Tetsükdaksüji policy atema tenüngdakbatem aser benokba inyakyim ya lir," ta CM-i ashi.

Assam: CID-i Bajali police ochi mashi ken o nung ASI ka apu

Guwahati, Rongjui/ September 14 (Agencies): Bajali police ochi mashi ken o dak sendakba nung criminal investigation department (CID)-i Assam nung ano police ketdangsiir ka puogo. CID-i, Patacharkuchi police station nungi assistant sub-inspector (ASI) Sasanka Das pua liasü.

Ken o dak sendakba nung anogo aika ken o ashishiba sülen Assam CID-i Das pua liasü.

Ken o iba ita tema atokba sülen temulung melemi bilemertem rongnung Sasanka Das-a densema liasü.

Sasanka Das apuba sülen

CID team kati Guwahati yimti kübok Beltola tesem nung taoba Bajali ASP Gayatri Sonowal indang sister-in-law'er ki meita oa liasü.

Taoba Bajali ASP Gayatri Sonowal indang sister-in-law ya magistrate ka lir.

Iba ken o nung taoba mapang apuba Assam police personnel tem rongnung taoba Bajali SP Sidhartha Buragohain, ASP Gayatri Sonowal aser la kinungbo Bobby Singh Sharma, DSP Puskal Gogoi, SI Anup Jyoti Patgiri, SI Debojit Giri, ASI Sasanka Das, ABC Injamamul Hassan aser gari anir ana; Deepjoy Roy aser Nabir

Ahmed nunger densema lir.

Kozü (supari) shishilembar Rabiul Islam-i FIR ka benokba sülen iba ken o ya temai atoka liasü.

Rabiul Islam-i ashiba agi, police ketdangsiirtemi pa tepsettsü tashi amokmeren aser sübokrem ama sen crore aika meshia liasü.

Report balala ajanga ashiba agi, police ketdangsiirtem yagi Islam dang sen crore 5 meshi aser sen magütsüra pa teyazü ken o benoka aputsü ta amokmerena liasü.

Iba ken o ya Assam police criminal investigation department (CID)-i bushisüngdangdar.

Assam: Opposition-i assembly toktsür ao

Guwahati, Rongjui/ September 14 (Agencies): CM Himanta Biswa Sarma kinungtsüer company-i central subsidy agizükba dak sendakba nung Speaker-i sensaksemtsü asoshi maongka magütsüba sülen Assam nung opposition party nungi MLA temi assembly toktsür ao.

Assam assembly session anogo pezübuba tatsük talem nung ken o jembia tenzükba sülen Speaker Biswajit Daimary-i House minute 15 atema adjourn sütsü aser iba sülen opposition MLA temi assembly toktsür oa liasü.

Central scheme ka kübok CM Himanta Biswa Sarma kinungtsüer company-i subsidy sen crore 10 agizükba dak sendakba nung sensaksemtsü khanga opposition MLA temi

assembly nung longkak aita liasü.

Assam Congress-i iba ken o sensaksemtsü atema adjournment motion notice ka agütsür liasü.

Question Hour tatemi Assam Speaker Biswajit Daimary-i, iba notice magizük aser ashiba agi, iba ya order nung mali aser adjournment motion ama züngshitsü malang.

Iba obendang ya magizüki Congress aser CPI-M MLA tem den Independent MLA Akhil Gogoi nungeri placard amer yimyim ayima longkak aita liasü.

Temetetsü kaji opposition party tem aser talisa Congress-i iba ken o dak sendakba nung Assam chief minister Himanta Biswa Sarma aser BJP aija arudar.

Bodhbarnü Assam nungi Congress MP Gaurav Gogoi, APC Scheme kübok agro-processing cluster project rongnung ka ama Assam CM kinungtsü Riniki Bhuyan Sarma indang Pride East Entertainment Private Limited züngoksema aliba kuli kaket ka social media ajanga lemsatapa liasü.

Assam Congress MP-i ashiba agi, "sorkar grant sen crore 10 approve süogo. Website hack asü asü masüar union minister nem osang agüjang."

Assam CM-i X nung "kü kinungtsü mesüra la sendaka aliba company-i India sorkar ket nungi subsidy kecha magizük ta ni jangjashitsüner," ta ashiba dak sendakba nung Gaurav Gogoi-i iba telangzüba ya agüja liasü.

# Libya tzümet süng lendong nung asür 6,000 dak tema jungogo



**Tripoli, Rongjui/September 14 (Agencies):** Libya nung tzümet süng tesashi ka aruba sülen asür 6000 dak tema jungogo, ta CNN sangdong ka ajanga metetdaksü.

Asürtem jangjatsü atema Bodhbarnü anepdang asadanga liasü, ta Tripoli nung Unity Government health ministry undersecretary Saadeddin Abdul Wakil-i ashi.

Ketdangsürtemi ashiba agi, mozükitem nung mortuary tem süngogo, koba teküzmükertem nem teyari agütsüsü nüngdaka liaka tang tashi shibanger lir.

Egypt indang emigration ministry-i ashiba agi, sorkari Libya nung asüba Egypt nunger nisung 87 tasü mang remtsüogo.

Ketdangsürtemi ano nisung 10000 dak tema samara alirtem ya tzüyim-i aponger ao mesüra jana nung rembanger alitsü ta tsübua bilemer.

Derna yimti metsüngba sülen nisung 30,000 dak tema talidak makai kümogo, ta Libya nung International Organisation for Migration (IOM)-i ashi. Iba tesem nung infrastructure tem kanga mejungi raksaba ajanga

humanitarian organization tem metongteti lir, ta CNN-isa metetdaksü.

Derna-i aoba lenmang tenet rongnung ana dang lapoker lir.

Kasa mapang nung ketdangsürtemi taküm alirtem maneni bushidar aser Islam yimsü nung aliba ama remtsüsü asoshi tasü mangtem bushidar.

Daniel yipru ajanga teküzmükertem inyaksangshi nung tetsükdaksü adokdaksüogo. Yipru yagi tongteprateptsü nunga tetsükdaksü adokdaksüogo.

# Crimea nung Russia indang air defence system raksatsüogo

**Kyiv, Rongjui/September 14 (Agencies):** Ukraine-i Crimea nung Russia indang air defence system raksatsüogo.

Kyiv indang security service (SBU) aser navy-i cruise missile aser drone tem amshia Yevpatoriya anasa Russia indang facility ka maka liasü, ta Ukrainian intelligence source kati BBC dang ashi.

Social media nung video balala ajanga, Russia-i atsünger aliba peninsula anüolen Yevpatoriya anasa mi aser mokozü adokba sayuogo.

Iba dak sendakba nung Moscow-i tang tashi osang kecha agüja mali.

Iba melena Russia indang defence ministry-i ashiba agi, parnoki Ukraine nunger indang drone aika khazüka yokogo aser naval patrol vessel ka amakba nokdangogo.

Brehostibarnü Crimean Peninsula nung bomb aika apokba osang agütsüogo. Crimean ya Russia-i 2014 küm ozüng alema atsünga liasü.

BBC indang intelligence source ajanga ashiba agi, Ukraine nungertemi radar array ka raksatsüsü atema drone tem amshi aser air defence missile launcher ka raksatsüsü atema cruise missile tem amshia liasü.

"Drone temi air defence system aser parnok indang radar tem dak rangloker inyaksangshia liasü. Radar station mapa minyaki küm daksüba sülen navy unit temi S300 aser S400 'Triumph' system tem Neptune cruise missile ana amshia amak, koba USD billion 1.2 shi alang lir," ta source-i ashi.

osang tejangja kecha magütsü.

Local temi osang agütsüba dak ajemdaker Ukraine media sangdong balala ajanga ashiba agi, bomb ya 05:40 local time (02:30 GMT) shi nung poka liasü aser military base ka anasa mokozü atokba nguogo.

BBC-i social media nung mokozü atokba indang video tem asadangogo aser Yevpatoriya amak asütsü ta asatetogo.

Kasa mapang nung Russia indang ministry of defence-i iba tesem amakba ya kecha tongtibang masü ama toktsüogo aser ashiba agi, parnoki Crimea nung drone 11 khazüka yokogo.

Crimea nung Russia-i amenokja aliba local ketdangsürtemia military facility raksaba mesüra air defence system raksaba indang osang kecha magütsü.

Russia indang S400 air defence system ya 2007 küm nungi amshia arudar aser iba ya Cold War-era S300 indang upgraded version ka lir.

Tesü sabuba yangluba missile tem yagi miles 250 (400km) tashi yima oteter aser anüngleni tur miles 30 tashi nung target tem khazüka yokteter.

S400 yagi aircraft aser ballistic missile tema raksatsüteter.

Tawa Ukraine-i Crimea meyipa agitsü atema jenjang talila agiba ama repringteter.

Parnoki Bodhbarnü Sevastopol makogo, koba Russia indang Black Sea fleet headquarters lir.

Ukraine nunger ketdangsürtemi ashiba agi, Russia nunger indang navy rong ana kanga mejungi raksago.

Kasa mapang nung Russia nunger ketdangsürtemi ashiba agi, iba tesem missile 10 amshia makogo aser nisung 24 tashi yirua liasü. Missile tem amshiba ajanga Ukraine-i tawa long-range injangtem taliba amshiba sayur aser item missile tem ya karbo linük nung yanglu tenzükogo.

Tawa Ukraini military-i sangdong ka ajanga, parnoki kidang design asüba Neptune cruise missile yanglu tenzükogo ta ashi.

Ukraine indang finance ministry-i ashiba agi, Ukraine project nung World Bank indang PEACE nung shilem ka ama parnoki United States nungi USD billion 1.25 agizütsü.

Ketdangsüri ashiba agi, iba sen ya military dak masü saka nüngdaka aliba nübürtem dak intoktsü.

# MULUNGEN 0



ASÜR WB. NUNGSANGMATONG

ASOBA: 20th MARCH 1933 ASÜBA: 9th SEPTEMBER 2023

Ozü tsürabur asür Wb. Nungsangmatong (Chuchuyimlang), Pa shirangba mapang aser iba lima nungi pilaba anogo tashi adianutem, tembartem, kiyongertem aser temeimertem shirnokisa ozü asüko mangyim mapang shisatsü, rongsen, nübu aser sarasadem ajanga yariogo, nenok ajak dang kanga pelaba lemsateper.

Nenek temeim aser teyari onoki kodanga mamatoktsü. Tsüngremi nenok moajangma.

*Temeim Kinüngtsü, Chirnurtem, Semchirtem aser Kinüngertem.*

# China indang warplane 68 aser rong 10 rüshiogo: Taiwan

**Taipei, Rongjui/September 14 (Agencies):** Taiwan-i ashiba agi, China-i asetkong meketa military tayimtsü 68 aser navy rong 10 yokogo. Shandong aircraft carrier-i anir anogo anabuba China-i iba asetkong meketa military training drill ka yongzüka agidar.

Beijing-i Taiwan ya parnok meyong ta züngshir aser parnok nükjidong ataloktsü asoshi nüngdak dang süra tashiyim amshitsü ta shia arudar aser tawa parnoki yimden yimsüsüba aser military dak sendakba nung Taiwan nongshia arudar.

"Brehostibar anepdang 6 ako tashi nung Taiwan temeket nung PLA tayimtsü 68 aser rong 10 inyaksangshiba jangjaogo," ta Taiwan indang Defence Ministry-i ashi.

Bodhbarnü Taipei-i, China nunger indang warplane 35 inyaksangshiba metetdaksa liasü.

Taiwan indang Defence Ministry-i ashiba agi, tayimtsü aser rong kar Shandong aircraft carrier den tzüyim aser anüng nung training agitsü atema Western Pacific nung

mejangjaba tesem kati oa liasü.

Parnokisa, Shandong aircraft carrier ya asetkong nungi southeast len nautical miles 60 shi pilar lir aser Western Pacific leni oya liasü.

Japan-ia, China nunger rongtem Miyako Strait adena iba tesemi aoba indang metetdaksüogo.

Ajisüaka iba tesem nung military exercise ayongzüka agiba indang China-i osang kecha lemsatepa mali.

Tawa US aser parnok den sendaktepa alirtemi sadem sadema senzüsenpongsü atema ayongzüker aliba benoka inyaksangshia Taiwan Strait aser mangatetep adoker aliba South China Sea nung inyaksangshia arudar.

Kasa mapang nung China-ia Taiwan temeket nung inyakyim ajungketogo aser Taiwan nüjiso atema nokdakertem aser US na longjemer inyaksangshiba aija arudar.

April ita tir Tsai Ing-wen-i, California nung US House Speaker Kevin McCarthy den ajurutepta sülen Beijing-i Taiwan longbanger military exercise ayongzüka agia liasü.



Morocco nung Marrakech tezülen Imi N'tala jila nung aftershock ka aruba sülen tetsür ka yirur anir aoba noksa nung angur. Bodhbarnü aftershock ka agi Morocco anokshitsüba sülen teküzmükertem ajak aoksdakja liasü.

## Mkg aser Kohima nung Sepaktakraw asayamung ayonger

**Dimapur, Rongjui/September 14 (TYO):** Mokochung District Sports Officer, Anguvito Sumi-i September 13 nü sangdong ka ajanga, Inter High School Sepaktakraw (Regu Event) Tournament ayongba metetdaksüogo, koba tetsür aser tebur naprongla atema asütsü.

Iba asyamung ya October ita mezüngbuba hopta asayatsü.

Asyamung dak sendakba nung Mokochung District kübok aliba High School ajak dang iba asyamung nung shilem agitsü magitsü iba indang osang September 22 nü tashi nungbo osang agütsüsü mepeshia metetdaksüogo.

Mokochung District nungi team tajungtiba ana (tetsür ka aser tebur ka) district tenüng nungi October 16 nungi 19 tashi IG Stadium, Kohima nung asayatsü aliba State Level Tournament nung shilem agitsü maongka angutsü.

Asyamung temzüng ozüng:

Team shia nung asayar 5 den manager aser coach alitsü. Asayamung nung shilem agirtemi parnok indang Aadhar Card aser Institution tekolaki agütsüba student certificate bena alitsü nüngdaker. State Level Tournament nung shilem agirtem nem sorkari latettsü aliba ama Travel Allowance (TA) aser Daily Allowance (DA) agütsüsü. District Level Tournament akokba team nem senpet sen 5000 (tetsür aser tebur naprongla) aser tanabuba jenjang nung tembangba team nem senpet sen 3000 agütsüsü.

Kasa mapang nung Kohima District Sports Officer-i sangdong ka ajanga district kübok asayatem Kohima District Inter High School Sepaktakraw (Regu Event) Tournament nung shilem agitsü jaokogo. Iba asyamung ya arishi küm 14 tekübok aliba tetsür aser tebur asayatem atema asütsü.

Iba asyamung ya October 7 nü 10 ako nungi tenzüka IG Stadium, Kohima nung

asayatsü.

Asayamung nung shilem agitsü atema asayar ka arishi küm 14 tekübok asütsüla aser 2009 küm October 19 nü mesüra iba sülen asortem asütsü nüngdaker.

Kohima District kübok tejangrartemi September 18 nungi tenzüka District Sports Office, Kohima IG Road nungi application form agizüktettsü.

Asayamung nung tetsür aser tebur tajungtiba pongungu shimtsü aser Kohima District tenüng nung State Level Inter High School Sepaktakraw Tournament (Regu Event) nung shilem agitsü, koba October 16 nungi 19 tashi IG Stadium, Kohima nung asayatsü.

Osang tejangjaba agitsü atema iba number: 9774650020 nung tongteprateptsü metetdaksüogo.

Asyamung akokba team nem senpet sen 5000 (tetsür aser tebur naprongla) aser tanabuba jenjang nung tembangba team nem senpet sen 3000 agütsüsü.

## Mkg nung football camp anogo melenshir

**Dimapur, Rongjui/September 14, 2023 (TYO):** Mokochung Deputy Commissioner & Election Officer, Thsuvisie Phoji-i sangdong ka ajanga, Mokochung District atema anogo ana angati coaching/ registration aser exhibition asaya asayatsü aliba sentong September 29 aser 30 nü agitsü telemtetba agiba

metetdaksüogo. Iba dak sendakba nung Principals/Head Masters ajak dang, atakzükja aliba anogo shilem agitsüpur 20 (tetsür aser tebur) Local Ground-i yoktsü mepeshia metetdaksüogo. Maneni camp nung shilem agitsüpurtem tenüng DC & DEO, Mokochung office nung September 18 tashi nungbo benoktsü metetdaksüogo.

## Demarai Gray Al-Ettifaq nung denogo



Demarai Gray

**Rongjui/September 14, 2023 (Agenciess):** Saudi league transfer window tatembangbuba anogo Everton winger Demarai Gray, Al-Ettifaq nung denogo.

Jamaica nung asayar ya sen kwi yong ao iba indang osang tejangja memetet, saka pa iba club nung küm pezü asayatsü atema tenangzüktepba yangluogo.

Europe nung temaba jenjang nung aliba league tem nungi nungutug asayatem aika ita Ishika tsünga Saudi League-i aoba sülen pa-a iba league nung denogo. Saudi nung asayatem atema sen aika intokba sülen Cristiano Ronaldo, Neymar aser Karim Benzema nungera iba league nungi asayadaki.

Arishi küm 27 tain Gray ya German team Bayer Leverkusen nungi 2021 küm Everton nung oa aden. Pa iba Premier League club nungi asaya 75 nung asayaogo aser iba mapang goal 12 idakja liasü.

"Team nung kü jenjang dak sendakba nung aika sensaksema aruogo. Ni club atema ground telung aser tema nung mapang

tajung aser tamajung ajak nung bendanga agüja inyakogo. Ni iba season-a club nungi takok tashi asayatsü renema liasü saka ibaji mataloktsü ama bilem. Ni jenjang tasen ka agitsü mapang tongogo," ta Gray-i ashi.

Al-Ettifaq-i taoba Liverpool captain Jordan Henderson alizükogo aser coach mapa bendaktsütsü atema taoba Rangers aser Aston Villa manager Steven Gerrard shimogo.

Football asaya nung nungtugu asayatem alizüktsü merangba sülen Saudi League-i alima ajunga anokshitsüogo.

Ronaldo, Neymar aser Benzema nung atsia aruba dang masü parnoki Lionel Messi aser Kylian Mbappe nata alizüktsü meranga liasü.

Champions League koker aliba asayar Sadio Mane, Riyad Mahrez aser N'Golo Kante nungera iba league nung asayadar.

Al-Ittihad-i Liverpool striker Mo Salah pound million 150 agi alizüktsü merangdang ajisüaka takok monguteti liasü.

## Iga Swiatek Guadalajara WTA event nung shilem magitsü

**Rongjui/September 14, 2023 (Agencies):** Iga Swiatek anisüngzüktsü atema iba ita Guadalajara nung asayatsü aliba WTA 1000 event nung shilem magitsü atema telemtetba agiogo, ta world number 2 asayar yagi Bodhbarnü metetdaksüogo.

Arishi küm 22 tain Poland tsürla, shiba taoba hopta US Open round pezübuba nung Jelena Ostapenko-i tsükdakja liasü, la tang Belarus tsür Aryna Sabalenka-i ajateta WTA rankings nung tanabuba jenjang nung lir.

Hopta 75 tashi temaba

jenjang nung aliba tembangba sülen Swiatek-i ashiba agi, la anisüngzüktsü nüngdaker.

"Tiamaka ni mapang melenshiba ajanga Guadalajara nung asayatsü aliba asayamung nung shilem magitettsüsa kümogo," ta Swiatek-i social media sabang X ajanga lemsatapa liasü.

"Ni kü temang anepalutsü nüngdaker kechiyong season kanga talang lir. Onok asoshi tinyaktsü tongtibangtibaji anema lia tatem tashi asayatsü aser miyurutsü atema kanga shisa ka-a sentong yanglutsü

nüngdaker," ta lai ashi

French Open champion Swiatek, shiba tang mezüngbuba September 17 nungi 23 tashi Guadalajara nung asayatsü aliba asayamung nung asayatsü liasü, la taruba ita tetenzüklen Tokyo nung asayatsü aliba asayamung nungi maneni asaya tenzüktsü.

US Open champion Coco Gauff, defending Guadalajara champion Jessica Pegula, 2022 runner-up Maria Sakkari aser Tunisia tsür Ons Jabeur nungger ajak iba asayamung nung shilem agitsü.

## Luis Rubiales Spain nung okadak kati jaokogo



**Rongjui/September 14, 2023 (Agencies):** Taoba Spain football federation tir Luis Rubiales, tetsürtem World Cup final sülen Jenni Hermoso dak kangshia tebang mesepba dak sendakba nung Hokolbarnü okadak nokdaksüsa kümogo.

Rubiales ya 1200 local time nung examining magistrate ka matsüngdang nokdaka, aija alir ka ama ken o angadaksü aser "sexual assault" dak sendakba nung pa aitsür aliba atema

telangzüba agütsüsü, ta Madrid court kati Mongolbarnü ashi.

Arishi küm 46 tain Rubiales yagi August 20 nü Sydney nung Spain team-i tetsür World Cup akokba sülen Hermoso dak tebang mesep, koba pai tangatettep nung mesep ta shia arudar.

National Court nungi obendanger Francisco de Jorge-i, Spanish prosecutors-i taoba hopta benokba tashishiba ka Hombarnü agizükogo, koba

"crimes of sexual assault aser coercion" dak sendaka lir.

Tawa yanglushiba Spanish penal code kübok tangatettep makai tebang mesepba ya sexual assault ka ama züngshitsü koba sexual violence tapu ajak den kasa dang lir.

Kangshia tebang mesepba atema senchi achitsü akok mesüra küm pezü tashi tepuokdak ayutsü akok, ta public prosecutors' office nungi source kati ashi.

Rubiales-i Deobarnü Spanish football federation tir mapa toktsüogo, ajisüaka tebang mesepba dak sendakba nung pai kecha aibelena mali ta shia arudar.

Arishi küm 33 tain Hermoso shiba, Mexico club Pachuca nungi asayar lai ashiba agi, nüngdak makaba nung tebang mesepba ajanga la dak tashiyim beshiba ama bilema liasü.

Laisa, Rubiales-i pa pusema jembitsü atema la nongshiba atema aitsüogo, koba prosecutor temi ashiba agi coercion ken o ka ama agitsü.

## BILEMDANGANG

"Tetsübu maliba ajanga lendonga aika ajurur."